

OLE SULU SAMOA



EKALESIA FAAPOTOPOTOGA KERISIANO SAMOA
OLE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

OLE SULU SAMOA

FEPUARI 2022

email: sulusamoa@cccs.org.ws - Main Office: Ph. 24414, Ext 30 - website: www.cccs.org.ws

FEAGAIGA OSIA AAULOTU MA FAIFEAU I SAMOA

EFKS VAILOA PALAULI
FAASALELEAGA.

EFKS LETOGO
VAIMAUGA



ENELE AUVAAS FS & RUTA
AUVAAS



ULATIFA AM & TAUGATALA
LEULUA'IALI'I.

FAASINO UPU

1. O LE LAUGA	2
2. FEPUARI MA LE TUSI FAITAU ASO	4
3. OSIGA FEAGAIGA, VAILOA	7
4. OSIGA FEAGAIGA, LETOGO	7
5. O LE PEROFETA MULIMULI	8
6. NA O AFIOGA E TULEI MAI	11
7. O E UA FAI I LAGI FOLAUGA	14
8. ATA & TALA O E UA MALILIU	16

O LE LAUGA

Tusi Faitau: Numera 11: 18 - 34

Manatu Autu: **O LE TAU O LE SA'OLOTOGA**
(THE COST OF FREEDOM)

O le uiga masani lava lea, tatou te feagai loa ma le mataupu o le ‘sa’olotoga’, e vave lava ona toe ave i tua le mafaufau. O soifua o tua ’ā ma toa, ma le toto masa’ā, na āsaina le mata’utia o le pogisā ma le pologa. O ni taulaga ola ua tatou saoloto ma fiafia ai talu mea ua latou faia, na lē mo i latou, a e ia oo mai i nei aso ma nisi augā tupulaga e fai mai. O lelei o le amio, o le manatua pea, fai ma faamalosi’au i nei aso, auā o ananafi, na fau ai nei. O nei foi e faamoemoe i ai se taeao manuia. A e afai foi e galo, po o ua lē fia manatua foi, mea la lea e tupu. O le fevaevaea’i ma le felautoa’i, ma foliga puaoa ai le lumana’i. O le aogā foi o le toe foi i tua, e lē ia toe aumai ai le matagā po o tū faanu’upō sa talitonu ma tapua’i ai Samoa; a ia toe vaai pe na faapefea ona maua lenei saolotoga. O le ā se tau o lo tatou saolotoga? O le uiga o le tala, o faiga ia e masani ai le Tusi Paia. A o le’i tali le fesili, e muamua ona fia iloa, po o le ā, pe aiseā foi lenei fesili? A o le’i tuuina mai se fofō, e tatau ona malamalama po o le ā le faafitauli. Pei foi la o le saolotoga. A o le fesili, e saoloto mai i le ā?

E tusa ai ma le Tusi Paia, e 40 tausaga o le sauāina ma le pologa o Isaraelu i Aikupito. Ua logo fofoga o le Atua i le tagi ma le auē o ona tagata, ua valaaui Mose, e alu e lavea’i ma faasa’oloto lona nuu. Taumafai le to’oto’o, a e lē mafai lava Farao. Ua ui ane i le vai ua liu toto, o faama’i ma manu e ‘aina ai faatoaga, a ua atili ona faama’ā aina ai le loto o Farao. Seanoa le toto o le tama’i mamoe, na fasia ai ulumatutua o Aikupito a e lavea’iina ai fanau a Isaraelu. O le tau lena o le saolotoga o Isaraelu mo le latou lavea’iina. Ua fai ane foi le Atua, a outou o e fai le Paseka, ia fasi le manu lelei a le aiga e sausau ai pou, fale’ie ma faitoto’ā o outou fale. Ia faia lea ma faamanatu o le toto na faaola ma faasa’oloto ai outou mai le pologa. A uma, ona fai lea o le ‘aiga o le Paseka. O le a’iga o le sa’olotoga i manuia ua outou maua talu le toto o le tama’i mamoe, o loo faia pea e oo mai i nei aso.

O lea ua faato’ā amata le malaga i Kanana, a e lagona loa le faitio ma le muimui ia Mose, faapea ifo, e sili ai lava Kemusa o Aikupito nai lo le Atua o Isaraelu. E ui sa pologa, a e sa aai ma feinu. E ui ina sa tigaina, a e sa leai ni manu fe’āi, vevela o le la, ma le mālūlū o le po. Ona mu lea o le fale’ie o Isaraelu o loo leoleo mai tuāfale. Ua faaigoa le afi ia Tapara. O le afi mai le Atua, o le faailo o mea e tutupu pe a le faatuatua le tagata i le Atua. Fai le Paseka, salamō, ona toe muimui foi lea. Sa avane le manai mai le lagi, ma le tuutuuga ia ‘aua ne’i oo se manai i le isi aso, a e ua o nisi nanā manai mo le isi aso. Ua susu’ē atu ‘ulo manai, a ua eloā ma manogi. O le tasi lena faamanatu o manai na maua mai le Atua. E pule le Atua i le lelei ma le leaga. Na fai le Paseka, o si taimi pu’upu’u ona toe faitio foi lea, ua faapea ane e sili lava Farao ma Aikupito. Tusa po o le a le pologa sa i ai, e fiu lava e ‘a’ai i povī ma mamoe. Valaau le Atua ia Mose, faasao uma povī ma mamoe a ia fa’āagi le savili malosi i le sami ma faaoso i luga o le lau’ele’ele le afe ma afe o salu. O le manulele lea o le salu (quail) e latalata lona ‘a’ano i le ‘a’ano o isi manu e pei o moa. Sa tapu’ē ma teu mo le masina atoa. O le faatonuga ma le faasā, a uma le masina ona faapaia lea o le nuu faatasi ma le salu mo le taliaina ma le faafetai o lena meaalofa.

A o le mea ua tupu, e tau ane Mose e fai le faapaiaina, ua toe itiiti ona uma salu ua leva ona aai ai le nuu. Le nuu lē usiusita’i ua noanoatia i le faamalieina o latou loto, ua lē manatu ai lava i le Atua, a e ua na o i latou ma latou laualo. Tuu ane loa i ai le faama’i oti, ma fano ai ola ona o le lē faatuatua ma le lē faamalieina. E i ai le tuugamau tele na lafo uma i ai, ua faaigoa ia Kiperota-atava (Numera 11:34), o lona uiga - ‘tuugamau o e na tu’inanaau’. Ua tatou faalogo foi ma iloa, e toatele i latou e le’i oo i Kanana ona o le masani lava lea. Na o sina taimi lava e salamō ai, ona toe foi lea i Aikupito o le loto. E foliga e sa’oloto i le tino, a e pologa ma noatia pea i le loto ma le agaga i mea vaivai o le ola. Auā foi e manatua mea vaivai, a e galo Lē na lavea’i i latou ma galo le tau o lo latou saolotoga. A fesili nei pe aiseā ua faapea ai le amio a lenei nuu, ia po o i tatou foi, i le tele o le agalelei o le Atua a e na o se taimi itiiti lava e manatua ai, ona toe foi lea i le olaga tuai.

E manatua ai le ulugali’i a Hosea ma Komeli. O Hosea o le talavou e naunau uma i ai loto ma mata o taupou o na aso. A o lea ua valaau i ai le Atua e alu i le maketi o fafine talitane, e saili le fafine talitane e igoa ia Komeli ma faatau i ana tupe, ona aumai lea e fai mana āvā faaipoipo. Sa faapena ona faia e Hosea. Ua ia aumai Komeli ua fai māna āvā, fasaga, faatā’ele, a e oo i le isi aso ua toe foi i le maketi. Ua alu foi Hosea ua toe au mai, a e malama le isi taeao ua toe leai foi. Toe su’e mai, sau fanau ona toe alu ai lea, a e fai a le alofa o Hosea. O tiga ia o le Atua ia Isaraelu. E fiu e alofa, fasaga ma lavea’i a e ua lē mafai lava le tu’inanaau o Isaraelu. Toe foi i le fesili, aiseā lava ua faapea ai Komeli, a e maise foi i tatou i nisi o taimi; se’ilogua oo mai puapuaga, ona faato’ a tapa lea i le Atua, toe itiiti ane foi toe liliu ese?

O le mea o loo tupu ia Isaraelu e pei ona fa’ataa mai e Komeli, o le vaivaiga masani foi lea o nei aso. O le agasala e fai ma le iloa. O le a le uiga, tatou te fiafia ai e fai le mea sesē e lē ona ua tatou mautinoa e leai sona taunuuga lelei, a e fai ona ua masani ai. O le a se loto, o se naunau e fai mea lelei, a mapuna ane loa lagona masani o le loto o loo saisaitia i vaivaiga masani, o le tali, e sili a Kemusa le atua o Aikupito, ua taugatā tele le Alii ma Lana saolotoga. O lena le

fete’enaiga lea e fai mai ai Paulo ia Roma 7, e taumafai atu ia lelei, a e i’u ane lava e lē lelei ma e lē fiafia. Aiseā? Ona ua taumafai mai foi mea ua masani ai po o mea ua lē mafai ona ave’ese, e fai ma tulafono o le tino a e ‘aua ne’i malo le tulafono a le Atua. A o ai na te faia ia fou? Faafetai ai i le Atua ona o Iesu Keriso. Le satauro ma le tuugamau, o le tau lena o lou sa’olotoga. Fai mai upu mulimuli, ua liliu ai lenei tino ua oti e fai ma tino e ola.

Ua tele fesili o tau saili nei ni tali po o ni fofō. O taua, o solo tete’e, faatupu faalavelave, o le Koviti-19, ma isi faafitauli, o loo tau saili ni vaila’au ma ni leleiga e faasa’oloto ai tagata mai ia tiga. O lea lava o loo tupu pea e lē o faaitiitia, ua faasolo ina uma le malosi ma le poto ua faigata lava. O Samoa foi ia ua pei o se afi mumū saesae sauaga, fasioti tagata, talepe fale, ma le Malo fesiligia le amiontonu o ta’ita’i. O loo anapopogi ma fai lotu a e ua atili ai le saosaoa o faalavelave ma mea e tutupu. O le ā nei se tali po o se fofō e fesoasoani e lavea’i ma faasa’oloto mai ai Samoa ai nei mala?

O le upu e fai i Faamasinoga, e le oti faalua se pagota. A uma ona tuli lona faasalaga, ona sa’oloto lea e le tatau ona toe fale puipui i moliaga lava e tasi, e iloa ai le amiontonu o le faamasinoga. O fea lava e alu i ai le pagota, ua a’oa’oina lelei mai le faigata o le sala. O le a saoloto e ola fiafia ma fai faai’uga sa’o mo lona lelei. E fiu foi la le poto ma le iloa o le tagata e tau saili ni tali ma fofō o nei mau faafitauli, a e a lē toe foi i le satauro e toe a’oa’oina i le taugata na mafua ai le saolotoga, e tupu pea tiga ma mala. O le Tusi ia Eperu o loo manino lelei ai le mataupu lea, o le maliu o Keriso, o le taulaga e tasi a e afe, e le toe faaluaina. O le a le mamao i tua o le 2000 tausaga, tatou te toe foi a i tua i le tafu’e o le satauro, na afua ai lo tatou saolotoga. Ia faamaualalo ma faatoese, tatalo ia tia’i loto faigata, a o faalologo le lalolagi i Lona siufogga, **Ua fai lenei mo oe ma a’u....** Amene.

*Saunia: Susuga Talalelei Tuafafao FS,
EFKS Mulinuu, Pulega Apia Sisifo,
MATAGALUEGA APIA.*

FEPUARI MA LE TUSI FAITAU ASO

ASO 1 - 5: LAPATAIGA O LE TAU- 1. MA UA TO TIMUGA

O le vaiaso lenei na faato'ā faataunuu ai le Fono Faavae a le Komiti Feau Eseese, sa tolopō mai le vaiaso talu ai, ona o le Tapunia (lockdown) o Samoa e tusa o Lapata'iga/Poloaiga mai le Malo - o puipuiga o le Faama'i Koviti-19. O Lapataiga mo le saogalemu. A o lenei foi vaitau o tele Lapataiga o le Tau, ia mataāla i loulouā o fesuia'iga o matagi ma uaga. O le lalolagi o Lapataiga. O lapataiga mo faiga malo ina ia pule ma le amiontonu, ia tausisia alafua faavaomalo, e i ai le Folasia Manino o Faatinoga (transparency), o le Tali atu ma tau'ave tuatuagia e lape ai auaunaga (Accountability), o Pulega Lelei ma Amiontonu (Good Governance) ma isi. Ua tele foi Lapataiga faasaga i sauaga matagā i totonu o aiga, le fa'aaogā ma fefaataua'i o fualā'au 'o'ona faasaina - le mariuana ma le 'aisa. Ma le tele o isi, ua tofusia soo se tupulaga, mai mauga tetele e oo i le lalovaoa, ma ona lapataiga i le ituaiga soifuaga e ola ai, ma amio faa-soli tulafono e 'alo 'ese mai ai. Mo le Ekalesia i le aufaigaluega ma lana misiona, o loo faapea foi ona le mapu lapataiga, ina ia faamalolosi i lana galuega misiona tala'i, folafola le Upu a le Atua, tauologologo le Tala Lelei, ina ia faia e tagata uma le Finagalo ma Poloaiga a Iesu Keriso le Alii ma le Faaola.

O Lapata'iga o le Tau i le Tusi Faitau Aso, e faamamafa le uiga loloto o le finagalo o le Atua, o loo i tua atu o le natura o mea na Ia faia - le la, masina ma fetu, le timu ma le matagi, laueelele ma le sami ma mea o i ai. O le natura e auauna, i lona lagi lelei, aso manino ma filemu, faapea foi i aso leaga, o le oge ma lā mala, o loulouā i afā, mafui'e, lolo, asiosio, sunami ma isi, e faatino ai le pule aoao a le Atua, ma le mea e finagalo ai o Ia i lea taimi ma lea taimi. O Timuga ua faatusa i ai faamanuiaaga mai le Lagi, o le faatusa o le Agaga Paia na te faasūsū le ola faatuatua ma le soifua tautua o le tagata ua faaolaina. Ia faamafanafana mai pea Lona Agaga a o feagai le lalolagi ma le Ekalesia, ma loulouā o faama'i pepesi ua afaina ai le sologa lelei o feau.

ASO 6 - 12: LAPATAIGA O LE TAU- 2. FAASŪSŪINA O LE ELEELĒ

Aso Sa - Ia fuga mai le toafa. *Iopu 29.* “²³*Sa latou faatalitali mai ia te a'u e pei ona faatali i le ua; sa latou faamaga o latou gutu e pei ona faamaga i le uaga mulimuli.*” O le sau, i eleele mātūtū ma nofoaga lautoafa o le lalolagi, na te polōmisi ma folafola mai se vavega o le totogo a'e, a o tali atu le eleele mago i le tupu, ola ma fuga mai. E faapena foi i le Upu a le Atua e fetalai mai ia i tatou. E mālū pei o le sau; e filemu pei o le vaveao. A e a tatou mataala i ai, ona totogo a'e lea, tupu lauolaola ma fua tele mai i totonu o i tatou.

Aso Gafua - Moomia le Vai. *Isaia 19,* ”*O le lāolāo e lata ane i le vaitafe, o i auvai lava, atoa ma mea uma ua totōina i le vaitafe, e magumagu ia, e faata'ape'apeina, e lē toe i ai lava.*” O lapataiga a Isaia mo fili o Isarael – e oo mai le faamasinoga ia i latou pe afai e lē suia o latou ala. O lea foi le lapataiga mo i tatou i nei aso. Po o fea le vaitafe ma le auvai o tatou ola a'e ai, tatou te fetaia'i ma mala pe a tatou soona faaleaga le foafoaga a le Atua. Pe afai tatou te lē tausisi ia paleni atina'e a le tagata ma le natura o le lalolagi, pe a lē amana'ia isi vaega o le foafoaga ma lē fa'aaloalogia isi meaola, o mala sa folafola e le perofeta - o lāmala, oge, faama'i, ma le oti - o le taui lea tatou te fetaia'i. O tatou lava e faia lo tatou faatafunaga, ma lo tatou faamasinoga.

Aso Lua - Se galuega lelei i aso uma. *Galuega 11,* “²⁹*Ona filifili lea taitoatasi o le au soo, ia faatatau i mea ua manuia ai, e avatu ai se alofa i le au uso o nonofo i Iutaia.*” O le avea o i tatou ma Kerisiano, ua valaauna ai i tatou o le ‘masima’ ma le ‘malamalamā’, e fafaga, faa’ofu, lagolago ma faafaillele i latou o mana’omia. O manaoga ia o le avea ma soo, ma e lē faigofie; o nisi taimi e matuā lē mafai lava ona faatino. Peita'i, pau lava le finagalo o le Atua, ia i ai sa tatou mea e fai – le mea sili tatou te gafatia, tusa pe itiiti – o le itiiti a lega mea. O Ia na te fa'a'ātoa, faamanuia, faapaia ma faamana e avea ma vavega.

Aso Lulu - Faailoilo o taimi. *Ieremia 18,* “¹⁴*E tuua ea e le kiona o Lepanona le papa i le vao? E pē ea le vai ese, ua mālūlū, ua tafe mai?*”¹⁵ A ua

faagalagaloina a'u e lo'u nuu, ua latou faamū mea manogi i le mea faatauvaa..." Ua faasino mai e Ieremia le faamaoni tūtūmau o le Atua i Lona nuu, e pei o le tūmau o āūga o le natura o mea - o le to'a o le kiona i le tau mālūlū, ma lona tafe ese pe a liu suavai. Pe a tatou lē iloa le Atua o galue i o tatou autafā, ona faigofie lea ona tatou pa'u'ū ifo i vaivaiga o le talitonu i o tatou lava ala ma tatou galuega – ma tatou ifo ai i atua faapaupau o le faaeaina, o tamaoaiga ma le saogalemū. E gata lo tatou savavali i ala o le amiontonu, pe a uma lo tatou savavali faatasi ma le Atua.

Aso Tofi - Ou te ta'utino atu. *Isaia 55, "E faapea foi la'u upu e alu atu ai lo'u gutu, e lē foi mai fua ia te a'u; a e peitai e faia e ia le mea ou te loto i ai, e manuia foi i le mea ou te auina atu ai."* E tāua upu ma faamatalaga, pei o folafolaga e fai i osiga feagaiga ma faaipoipoga. O loo tatou i ai nei i se lalolagi o fesootaiga televavave e faia i upu ma tusitusiga. O le lalolagi foi ua tele ina femilosa'i solo, faauiga sesē ma faaitiitia le tāua o upu; o i ai nisi ua fai upu e faaleaga, ma faatupu maseiga, ua lafoa'i le moni o upu ma latou uiga, ina ia tusa ma o latou lava manatu, po o faauigaga o le upu moni. Ua faigatā ona iloa le eseesega o upu moni mai upu pepelo. O i tatou o Kerisiano ua iloa le mea e saili ma maua i ai le upu moni – i Afioga a le Atua, ua liutino tagata ia Jesu Keriso ma o loo i totonu o Tusi Paia. Ua tuuina mai e le Atua Lana upu ia te i tatou. O lo tatou tiute le tausi faamaoni i ai ma ia faa-fua mai.

Aso Faraile - O le manuia mautinoa. *Isaia 43, "A ē sopoia atu le vai, ou te ia te oe; a ē sopoia atu vaitafe, e lē lofia ai oe; a ē savali i totonu o le afi, e lē mū ai oe; e lē susumuina foi oe i le mumū o le afi."* O tapu ma puipuiga o le Faama'i ua alia'e mai ai le faanofo'esea, nofo to'atasi ma tuulafoa'iina i totonu o tatou sosaiete, ua lē mafai ona tatou 'a'apa atu e faamafanafana. Ina ua faaitiitia fesoota'iga i le tauvalaau atu o le tasi i le isi i le va e lua ma le 'afa mita. Mo ē ua tuulafoa'iina, faanofoesea, faanoanoa ma popole, mata e mamaao se mea o i ai le faamoemoe pe leai foi, ma o le toatele ua tuufesili ane, 'O fea o i ai le Atua?' i nei mea uma (Salamo 42). O tatou o Kerisiano e maua lo tatou faamoemoe ma faamafanafanaina i folafolaga a le Atua, e faatasi

mai ia te i tatou, i le mea nei ma le taimi nei, o ā pefea e tula'i mai. O le afio mai o Emanuelu, lea e faamamalu i Kerisimasi taitasi, o le faataunuina lea o valoaga a Isaia ua faitau senituri talu ona fai. O le Atua ua i ai ma i tatou – i le 'lua, afi ma le pelu' e pei o upu o fatuga a Frederick Faber. O iina o loo taoto ai lo tatou manuia mautinoa.

Aso Toona'i - O lelei lau nofo? Iakopo 5, "Tatalo le tasi mo le tasi. Ua aogā tele le tatalo faatauanau a le tagata amiontonu."

Ua apoapoa'i mai Iakopo ina ia liliu ma faasaga tasi i le Atua i soo se tulaga e tula'i mai. E pei foi o le valaau a Paulo ia 2 Tesalonia 5, "Ia tatalo e lē aunoa." O le tatalo e faia ma le loto atoa (e pei o Elia na tatalo ia 'aua ne'i timu, ma sa faapea lava ona taunu i le 3 ma le 'afa tausaga), e taunu ai faamoemoega. O lona uiga ea, o tatalo faatauanau ma faia soo, e mana'omia ai le soona la'u o upu e tele? O nisi taimi, e avea ai a tatou upu ma faalavelave i fesoota'iga moni ma le Atua. A oo ina tatalo, e lē mālolō le mafaufau i lea ma lea. O loo i ai le leo ititi ma le filemu o le Atua e fia talanoa mai, e fia nofo lelei ma i tatou, a e na te mana'omia se malū ma le sāō, ina ia mafai ai ona lagona atu o Ia. Pe afai e lelei la tatou nofo, ona amata loa lea ona galue mai le Alii.

ASO 13 - 19: NA AMATA I SE SOGI.

I le gagana faa-Koluse Mūmū ma Fesoasoani Muamua, o le 'sogi o le ola' e faaigoa ai le faatinoga o le sogi ma mānava atu o le 'ea i totonu o se tasi ua lē mafai ona mānava. O Tusi faitau o lenei vaiaso ua autū i le sogi, ma e latou te toe ta'ita'iina i tatou i tua i le amataga, i le foafoaga, i le fesaga'iga a le Atua ma le tagata, i le ulua'i faatinoga o le alofa o le Atua mo i tatou, na amata i le sogi – i Lona sogi mai ma mānava mai le ola i totonu o le tagata na Ia fai (Kenese 2:7). O loo valaau le fai Salamo i le Atua (119:25), "ina ia mānava mai le ola, e tusa ma lau afioga," auā o afioga a le Atua na te faaola ma faaolaola mai.

Pe a faatino le sogi atu/sogi mai, e lagona e le tagata atoa faalogoga uma e 6 - e lē gata ua vaai mata ma faalogo taliga, a e ua sogitia i le nanamu, ua tofo foi ma ua mafanafana fesoota'iga o le tino, mafaufau

ma le loto. E olioli ma fiafia lagona e si'omia le sogi. Peita'i o le maitau atu i mataupu o aso taitasi o lenei vaiaso, e laualuga le lagona o le tiga ma le matuitui o loo siosiomia ai le lotoifale o i latou o loo avatua le sogi ma ē o taliaina mai. Na amata i le sogi a Iakopo ia Isaako (Aso Sa) - o loo si'omia i tiga o taupulega ina ia 'olegia, o tiga o le fāoa o tofi, ma le oona o le toe tuia e le uso moni. O le Pese a Solomona (Aso Gafua) o loo mamanu i le alofa o le alii i lana manamea faatino i lana sogi, a e ma'imau pe ana leai le oti. O le alofa o loo atagia ai le fesootaiga alofa o le tagata ma le si'osi'omaga na faia e le Atua, a e maise o loo faatusa i ai le alofa o le Alii Toetu o Keriso i Lana Eklesia. O le Aso Lua o loo feasogi ai ma loimata maligi ia Naomi, Ruta ma Orepa i le matuitui o mafutaga o le a tete'a. Ua oti Elimeleka, maliliu Maalona ma Kilionia, ua tu'ua na o fafine, a o lea foi o le a taumavae. E sili ona tiga le alofa o Tavita ia Ionatana (Aso Lulu) ina ua motusia le noataga o le alofa o faiga uo faamaoni. E ui ina ua tatau le oti o Amase (Aso Tofi), a e lē ave'esea le tiga o le maliu fasia o le tagata sa tautua tuāvae, ma togi lana ma'a i faiga malo a Isaraelu. O le sogi a Iuta (Aso Faraile) ua na o se faamaufaailogaina lea o tiga ma puapuaga o le Alii o Iesu, amata mai Ketesemane se'ia oo i luga o le satauro. O loo taualuga le vaiaso i le sogi paia (Aso Toonai). E ui ina e lē faatinoa e le EFKS i ana tapuaiga ma sakarameta, a o le faamamafa o loo i le fealofani, le filemu ma le olioli faatasī o i latou ua fusia faatasī i le faatuatuaga i le Alii o Iesu Keriso. Ia manuia le faiga malaga a i latou ua tatou sogi faamavae atu i ai, i lenei masina o Fepuari.

ASO 20 - 26: IONA

O Iona le lupe, se tasi o toa o le Tusi Paia e muamua faalogo ma tautalatala ai tamaiti EFKS, e ala i fesili ma tali a le Faitau Pi - O ai na folo e le i'a? E fia le umi na i ai Iona i le manava o le i'a?... E masani ai i tala o le Lotu Tamaiti, a e maise o Lauga i Aso Sa. O se tala e tumu i a'oa'oga tāua mo soo se augā tupulaga, i le va feagai ai ma le Atua. Ua toe faamanatu mai foi i nei aso o feagai le lalolagi ma a'afiaga ogaoga o faama'i oti, o taua ma sauaga, o suiga ma loulouā, o soliga tulafono ma pulega leaga.

E lē falala fua le niu, a e ona o le matagi. E ala ai ona fesili, pe aisea nei mea ua tutupu mai? 'Aua ne'i faapea, 'Ua pau lava', auā fai mai upu o le Pese 225, 'E le tupu fua mea faapena'. Pe ona ua malosi le agasala faa-Nineva? Pe ona e toatele ua sosola faa-Iona ai luma o le Atua? Pe ona ua mana'omia le salamō faamaoni faa-Nineva? Pe ona ua malosi le manatu faapito faa-Iona, faailoga tagata, faailoga ituiga? Pe o se fafagu i le galuega faa-Iona a le Eklesia, le avanoa faalua ua toe tuu mai? E toe fafagu i le soona ita fua ma lotovale le tagata, ina ua alofa mutimutivale le Atua i isi tagata tatou te manatu e le agavaa mo ni mea lelei? E tofu le tagata ma lana faitau ma faauiga, auā o afioga paia a le Atua e lē tagatasi, a e matalasi ona uiga. A o le itu e sili ona tāua, ia faatatau ifo e le tagata ia te ia lava.

Na saili faresaio ma tusiupu Iutaia ia Iesu, e fia maua se faailoga ia te Ia (Mataio 12:38, Luka 11:29), ona tali lea o Iesu ma a'oa'i e ala i le faailoga ia Iona:

(i) E pei ona sa i ai Iona i le manava o le i'a i ao ma po e tolu, e faapena o Ia i lona maliu ma tanumia i le tuugamau i aso e tolu.

(ii) E pei ona sa toe luai mai o Iona mai le manava o le i'a, e faapea foi ona toe tu mai o Ia mai le oti.

(iii) E pei ona sa valaau faalua ma alu ai Iona i Nineva, e faapea foi ona toe afio faalua mai o Ia.

E tusa o le fia saili masei o le au Iutaia ia te Ia, ma latou fia iloa o se faailoga, e a'oa'i mai foi Iona:

(iv) Pe a oo i le Faamasinoga, e molimau le faalogo ma vave salamō o Nineva tagata faapaupau, ua tuufaafeagai ma lo latou loto ma'a, latou o Isaraelu fia mapo Atua.

(v) E faapea foi ona molimau le mamao o tuluiga o le lalolagi na alu i ai Iona, a e na talia e Nineva. A o i latou o fesagai ma Iesu i aso uma, a e lē talitonu.

(vi) E pei o le tupu fafine faapaupau e lē iloa le Atua, na alu ane i le mea mamao e saili i le poto masani faalelalolagi o Solomona, ma ia maua. A o i latou o fesaga'i ma le Atamai silisili ese ma le Tupu e sili atu ia Solomona, a e latou melea, ma teena o Ia.

(vii) O le aotelega o lana a'oa'oga, o fia ta'u atu ai ia Iutaia, o latou auga perofeta ma auga tupu, e faasino uma i Le ua auina mai e le Atua, Lona lava Alo pele e toatasi, ina ia faaola le tagata agasala, e ui ina lē agavaa ma lē talafeagai ai.

OSIGA FEAGAIGA EFKS VAILOA, PALAULI

O se faamoemoe ua leva ona fuafua ma talosia, le osiga feagaiga a le EFKS Vailoa Palauli ma lo latou faifeau, le susuga ia Enelē Auvaa ma le faletua ia Ruta, ina ia faatino i le Aso Faraile 4 Fepuari 2022. Ma e ui ina sa feagai tonu le atunuui i ia aso ma tapu o puipuiga o le faama'i Koviti-19, a e sa faataunuu lava, i aiaiga sa faatapulaa ai i latou e auai. Na ta'ita'i le susuga Leaso Tupa'i FT, o le Toeaina o le Pulega Palauli, KMTA Faasaleleaga, o le Failautusi KAT. Na molimau le faapotopotoga o sui o le afioaga, le Pulega ma le Matagaluega, o aiga na lua, o uo ma aumea a le faifeau ma lona faletua. O le Tusi Paia na faitauina e Fereti Sefo FS (Vaitoomuli), o le Lauga mo le Faifeau ma le faletua na saunia e Mose Tanielu FS (Puleia), o le Lauga mo le Aulotu na saunia e Uilipefosi Konelio Te'o FS (Fa'ala), a o talosaga na ta'ita'iina e Niulala Kupa FS (Tafua) le Failautusi o le Pulega.

Na saunoa le tiakono matua, le tofa Autagavaia Uiese TK fai ma sui o le Ekalesia e molimau e tusa ma la latou filifiliga, sa tali fuaiteau foi le faifeau e tusa ma la la'ua faai'uga e talia ma le loto maulalo ma le agaga faafetai le valaau. O i latou na fai ma sui o le Ekalesia Aoao, le Matagaluega ma le Pulega, e faafeiloa'i faamanua le faifeau ma le faletua, e aofia ai Toeaina o le Matagaluega Faasaleleaga, susuga Viliamu Samoa FT, Fafafia Toleafoa FT, le faletua ia Faafetai L. Tupa'i o le sui o le itutino Tina, le Tiakono Toeaina ia Tuileutu Alaivaa; sa le'i auai le Toeaina o le Pulega Salega, Faasavala Leilua FT ma le faletua o loo feagai ma le malologa e tusa ma le faavae.

O le susuga Enelē na i'u mai Malua i le 2009, ona galue lea i le Ekalesia o se faia'oga i Kolisi Malua fou ma le Kolisi Tuasivi se'ia oo ina valaau i ai le Aulotu i Vailoa. O i la'ua o ni lupe faalele ma taulaga soifua a aiga ma Ekalesia i Saasaai ma Lalomanu. Na tatala le Feagaiga a le EFKS Vailoa ma le tamā Penisione ia Siaosi Leleimalefaga FS (ua maliu) ma le Faletua ia Pele i le tausaga 2020, ona tofia lea o le susuga Letaulau Esau AM, o le A'oa'o ua i'u mai Malua, o se tama fanau a le afioaga ma le EFKS i Vailoa Palauli, la te tausia le galuega e faatali ai so latou faifeau. O loo faatali foi i la'ua mo se valaau, auā lava le galuega faa-faifeau i Samoa po o atunuui i fafo. Ia faamanua le Atua i le galuega ua valaauiua ai nei le susuga Enelē ma Ruta, manuia foi le Aulotu i ona tulaga faalupe, ma la latou galuega fai faatasi.

OSIGA FEAGAIGA EFKS LETOGO, VAIMAUGA

Na tusia le itulau fou o le EFKS Letogo, ina ua osia la latou feagaiga ma la latou Faifeau, le susuga Ulatifa Leulua'ialii AM ma le faletua ia Taugatala, i le Aso Faraile 18 Fepuari 2022. O le ulua'i feagaiga osi foi lea a lenei Matagaluega fou o Vaimauga, talu ona vaeluaina mai le Matagaluega Apia Sasa'e i le Fono Tele o le tausaga talu ai. O lenei sauniga mamalu na ta'ita'iina e le Toeaina o le Pulega Vaimauga Sisifo, susuga Enefatu Lesa FT, ona o loo saili togafiti le Toeaina o le Pulega Vaimauga Sasa'e, ia Aila Patea FT. O le au mautofi o lea sauniga, o le susuga Falesefulu Falesefulu AM, o loo tausia le Aulotu i Letogo, o ia na faitauina le Tusi Paia, o le susuga Irenio F. Tagaloa FS (EFKS Eva) na saunia Tatalo, o Sepi Gafa FS (EFKS Solosolo) na saunia le Lauga mo le Faifeau ma le Faletua, o Pita Toleafoa FS (EFKS Laulii) na faia le Lauga mo le Aulotu. Na saunoa le sui o le Ekalesia e molimau e tusa ma la latou filifiliga mo se tasi e tausia le galuega (talu ona tu'ua e le faifeau o Lavilavi Soloi FS), ma sa faapea foi ona tali fuaiteau le susuga Ulatifa i le agaga faamanū i le Atua mo Lana tofiga, ma le faafetai i le faatofalaiga a le Ekalesia i Letogo. O i latou na valaaulia e fai ma sui o le Ekalesia Aoao, le Matagaluega, Pulega ma Aiga na lua, e faafeiloa'i aloa'ia le Faifeau ma lona Faletua, e aofia ai le Afioga Taitaifono Komiti Au Toeaina susuga Asotasi Gu Time FT, afioga Failautusi Aoao EFKS susuga Vavatau Taufao FS, afioga Asi Tuataga Blakelock o aiga na lua ma isi. Na folasia foi le o Feagaiga na saunia e le Ekalesia Letogo faapea foi le paia o Aiga o le Faifeau ma le Faletua.

O le susuga Ulatifa ma le faletua na faai'uina le taumafai mai le Kolisi Faafafeau Malua i le tausaga 2019, ona galue lea i le Ofisa Tutotonu o le Ekalesia i Tamaligi, i le Matagaluega a le Failautusi Aoao i le Vaega Faamisionare, i le tausaga 2020 se'ia oo ina valaau mai i ai le Ekalesia i Letogo. O se lupe faalele mai le afioaga o Moataa, i le afio o Tofaeono ma Tama ia Asi ma Patu, le mamalu i le Usoalii faapea i La'ua na ta'i ma le nofo ituaiga ia Fuata. O tu ma aga masani faa-EFKS sa faatino e pine ai lea aso, ma taape ai le aofia ma le agaga faafetai ma vivii i le Atua, ua taunu faamoemoega lelei. Ia manuia la outou galuega fai faatasi, mo le viiga o le Atua. Talosia foi le sailiga fofō mo le gasegase a le susuga i le KMTA o le Matagaluega, Aila Patea FT & Valasi.

O LE PEROFETA MULIMULI

(*O le Tala Faa-fagogo ua faa-Samoaina mai le tusi, The Last Oracle, tusia e James Rollins*)

Na faataiō le tama'ita'i ma solomuli atu pipi'i i faava'a o le faitotoa, o lona fefe tele na ia lē maua ai le avanoa matala o le auala.

"Faamalie atu," na fai atu ai Kouasaki ma liliu faasino lana fana i luga i le tumutumu o le fale.

Na faavave atu Karai taamilo i le leoleo lē mautonu. "O loo lelei mea uma, tamaitai. O ma'ua o sikulakī o le fale mataaga. O lea ma te su'esu'ea le gaoiga na fai e nisi."

Na faasino atu e Kouasaki lana fana i le ipu ua ta'e salalau i le fola. "E sa'o, na tata'e e se isi le ipu lena." Na ia faasi'u mata atu ia Karai na te faamaonia ma faaopoopo i lana pepelo, a o ia toe sulu lana fana i le faamoega.

Na tuu a'e e le tama'ita'i lana tama'i 'ato i lona fatafata. O le isi ona lima na ia faasagatonu ai lana mata tioata i luga o lona isu. E tusa ma lona lauulu enaena sa 'oti faalapotopoto ma lona fuatino itiiti, e foliga o ia o se tama'ita'i tausaga lua i se kolisi, peita'i a fua i matogitogi i autafa o ona mata, e manino i le masalosalo, e lē taumate e sefulu tausaga e matua atu ai.

"E mafai ona ou vaai i ni lua pepa faamaonia?" Na ia fai mai ai ma le to'a, a o tu latalata i le faitoto'a matala.

Na fa'aali ane i luga e Karai lana pasi faamaonia lanu uliuli. O loo i ai lona ata, faatasi ma le faamaufaailoga a le peresetene o lolomi i le lanu auro. "O loo ia te a'u se numera e mafai ona e valaau i ai e faamaonia ai i ma'ua."

Sa tilotilo faanunumi atu le tama'ita'i i le pasi faamaonia ma sa pei ua tuu itiitia ai lona vevesi, e ui ina maitauina sa totoe pea le mata'alia i ona tau'au. Sa ia vaavaai solo i le potu. "Sa i ai se mea na gaoia?" "Masalo e sili atu ona lelei lou tali i ai," na fai atu ai Karai, ma le faamoemoe o le a maua mai ai se fesoasoani. "Na ou maitauina ua i ai se tupe siliva ua mata'utia lona misi mai le laulau lea."

"E ā?" Na ia faanatinati atu i le laulau aunoa se toe faatali. E tasi lana vaai i luga o le laulau, a e liua ona foliga i se pupula faanoanoa tele. "Oi auē, e leai...na matou nonō faanoi maia le aofaga tupe siliva lenei mai le fale mataaga o Talefaia."

Ua toe ta'ua mai foi Talefaia.

Na tepa atu le tamaitai i le fale lapotopoto na vaneina mai le ma'a, le mea peisea'i sa tosina tele i ai Poleki.

Pe atonu ona sa faalagolago i ai Kouasaki. "Faamolemole 'aua e te tago i le mea lena."

Na tu sa'o i luga Kouasaki. Na ia vaai ifo i lona alofilima, pei e tu'ua'i i ai. Ona mimilo lea o lona ua i le matamuli, "Faamalie atu."

"E mafai ona ou fesili atu po o le ā lena mea?" Na fai atu ai Karai a o ia genogeno atu i le ma'a.

Sa taataai lima o le tamaitai i le popole. "O le faailoga lea o le aofaga. Mo le fa'aaliga o loo loma nei. Faafetai i le Atua, e le'i faaleagaina pe gaoia e tagata faomea." Na ia faataamilomilo ai ina ia mautinoa. "Ua silia ma le afe ono selau tausaga lona matua."

"A e o le ā tonu lava lenei mea?" na tauanau atu ai Karai.

"E ta'ua o le omofalosi. O lona faaliliuga e pei o se 'pute'. O aso anamua i Eleni, o le omofalosi sa talitonuina o le tulaga ogātonugalēmū lea, sa taavilivili ma taamilo ai i ona autafa le lalolagi. E tele anoanoa'i talatu'u mai le vavau faasino i le omofalosi, ma e anoanoa'i foi lona mana, le malosi ma lona paoa."

"A e na faapefea ona e mauaina mai?"

Na ia luelue faasino atu i le laulau. "Na aumai i le aofaga lava e tasi e pei o isi mea na. Na nonō uma mai le fale mataaga i Talefaia."

"Talefaia? Ile nofoaga na i ai le malumalu o le Perofeta o Talefaia?"

Na tepa taula'i o ia ia Karai, o ona foliga ua te'i ma ua ofo. "Sa'o lelei. O le omofalosi sa teuina malupupuia i le ogatotonu o le malumalu. O lona potu aupito pa'ia lea..."

"Ma o le ma'a la lenei."

"E leai. O le faanoanoaga lena, ona ua na o se faatusa. E oo lata mai nei, sa talitonu tagata, o le ulua'i omofalosi moni lenei, e pei ona faamatala i tusitusiga o le vavau ma tala faasolopito a Puluta ma Sokarate. Peita'i o le faalapotopotoga o perofeta fasine o Talefaia, e tala i tua lona faasologa i auga tupulaga o le tolu meleniuma, ma o le maa lenei ua faatulagaina ona aso, ua na o le 'afa o lena matua."

"O le a le mea na tupu i le ulua'i maa?"

"Na leiloa i le tala faasolopito. E leai se tasi na te silafia."

Na faasa'o lana tu ona savali atu lea i se ofu tali palapala sa tautau i se pine faamau i autafa o le faitoto'a. Na ia faamaulu, ona ia tō ese lea o lana

pine faamaonia o le fale mataaga mai lona ofu, a e faapipii i lona ofu tali palapala.

Ona faato'ā iloa lelei atu ai lea e Karai o lana pine faamaonia. Sa i ai le ata ma le suafa i lalo ifo.

POLEKI, E.

"Poleki..." na faitau leo tele ai e Karai.

"Ia, o le Foma'i Elisapeta Poleki."

Na maniti le tino o Karai i lagona pei ua ulufia e le aisa mālūlū. Na faafuase'i ona ia iloa le mafuaaga na sau ai le polofesa iinei.

"Pe mata e i ai se avanoa, e te silafia ai se tagata e suafa ia Atipale Poleki?"

Na atili ai ona faatau pupula mata o le tama'ita'i ia te ia. "Lo'u tamā? Aisea ua e fesili ai?"

Setema 5, 7.22 afiafi.

Uosigitone, DC.

"Ua maliu?"

Sa nofo Karai i le pito o le kesi i le potu teu oloa o le fale mataaga. Na ia iloa le tiga o le tala o le a ia faamatala i le tamaitai. O Elisapeta Poleki sa solovī ifo i le nofoa, faa-gaulua i totolu o lona ofu su'esu'e. Sa le'i i ai ni loimata. O le segia o lona mauli na poloka ese ai, a e na ia tō ese lana mata tioata itiiti, e pei o loo saunia o ia.

"Na ou faalogo i le tala i faapāpā fana sa fai i luga o le Molo," na ia memumemmu ane ai. "Peita'i o leai ma so'u mafaufau..." Na lūlū lona ulu. "Na ou i ai i totolu o le sela iinei i le aso atoa."

Ile mea e lē ola ai se telefon fe'avea'i, sa memumemmu lēmū ai Karai. Na ta'ua e Penita lona taumafai e faafesootai le afafine o Poleki. A o lea sa i ai o ia i le Molo i lea taimi atoa.

"Ou te faamalie atu i lo'u saga tuliloa o oe i lenei mataupu Elisapeta," na fai atu ai Karai, "a e o anafea na e vaai mulimuli ai i lou tamā?"

Na faigata ona folo i totolu lana mānava, ua amata ona lē sagatonu. Na gatete lona leo. "Ou te...ou te lē mautinoa. Ua tusa ma se tausaga talu ai. Sa i ai se ma'ua fe'ese'eseaiga. Oi, le Atua e, i a'u upu na lafo ia te ia..." Na ia tuu a'e lona lima i luga o lona muāulu.

Na faitau atu e Karai le salamō ma le matuitui i totolu o ona mata. "Ou te talitonu sa ia iloa lou alofa ia te ia."

Na ia toe faatau pupula malosi ia Karai. "Faafetai mo au saunoaga. A e te le'i iloa lelei o ia, a ea?"

Na lagonaina e Karai le faa-faigata ma le fefeu o loo natia i totolu o foliga filemu ma le lē gaoiā o loo pito

mai i fafo. Na ia faasaga atu e fesaga'i ma le to'atama'i o le tama'ita'i, i lona iloa lelei o le tiga o Elisapeta sa faasaga aga'i i totolu ia te ia lava, nai lo le aga'i mai ia te ia. O Koualasaki ua tumuli mamao atu i le itu o le potu, sa manino lona lē nofo nofo lelei i taualumaga o loo fai nei.

Na feliuliua'i Karai i le mea na nofo ai ma tusi atu faasino i luga o le laulau. O le laina o tupe siliva anamua sa taatitia ai lava i luga o se pepa mimiti vaitusi sa i ai. "Ou te iloa auā sa matou maua ai se tupe siliva i le tino o lou tamā." Na manatua e Karai le faamatala atu e Penita ia te ia le mea na tupu. "O se tupe e i ai le tino o Fausitina le Matua i le tasi itu, a o le Malumalu o Talefaia i le isi ona itu."

Ua atili ai ona faa-lautele mata o Elisapeta. Sa ia faataupupula ifo i le avanoa sa taatia ai le tupe siliva. Na sii a'e i luga e Karai lona lima. "Na sau o ia iinei, a e le'i fanaina o ia. I lou ofisa."

"E lē o so'u ofisa," na ia tomumu ane ai, a o vaavaai solo, peisea'i o saili le aitu o lona tamā.

"O loo fai a'u su'esu'ega mo pepa o lo'u faailoga faa-foma'i. Ia silafia o le mea moni lava o lo'u tamā na ia faia nisi feutagaiga, ma ou maua ai lenei avanoa i le Fale Mataaga o Talefaia i Eleni. Ua leva ona ou i ai se'ia oo mai i le masina talu ai. Ma o a'u lea e ta'ita'i le vaaiga o le fa'aaliga. Sa ou lē manatu na silafia e lo'u tamā sa ou iinei. A e maise lava, ina ua uma la matou -" Na ia tālo ese lana tala na tau fai atu.

"Masalo sa ia tulimata'ia le gasologa o lou olaga ma au gaioiga."

Na maligi ifo nai loimata, ma tafe ifo i se tasi o ona alafau. Na vave lava ona ia soloi ona foliga i le pito o lona ofu su'esu'e.

Na tuu i ai e Karai sina taimi. Na ia sisila atu ia Koualasaki, o savalivali lē lavā faataamilo i le maa omofalosi, pei se masina o loo faataamilo mālie. Na iloa e Karai sa taamilomilo faapea foi le tamā o Elisapeta i le maa. A e aiseā?

Na faaleo foi e Elisapeta lenei lava fesili. "Aiseā na sau ai lo'u tamā iinei? Aiseā na ave ai e ia le tupe siliva?"

"Ou te lē iloa. Peita'i ou te mautinoa sa silafia e lou tamā sa tulituli ma sailia o ia e tagata." Na ia pu'ea faale-mafaufau a o tau lafilafi solo Poleki i tulimanu o le Molo, ma tau saili se auala e fesootai ai ma Sikima, a e ia lilo o ia. "Atonu sa ia ave le tupe ina ne'i fasiotia o ia. O le tupe sa 'elea, e faigofie ona misi i totolu o le taga, pe afai e su'e e tagata osofa'i lona tino. Peitai o se saililiiga auiliili i le fale maliu o le

a iloa ai le tulaga ese o le tūpe. Ou te manatu sa faamoemoe o ia e ono tata'i mai ai iinei. I le ofisa lenei na te iloa o le a e faia ai le lipoti ua gaoia." Na mātū loimata o le fafine a o fai lana tala. "A e aiseā o le a ia faia ai lena mea?"

Na moeiini e Karai ona mata, mafaufau loloto, ma na tuu ona vae i seevae o le tamaloa. "Pe afai e sa'o a'u e uiga i le tūpe, sa popole lou tamā ina ne'i fai se sailiga o ia. Atonu sa ia iloa o loo i ai se mea na sailia ma tulituli e tagata osofa'i. O se mea sa ia te ia..." O le mea moni lena.

Na pupula mata o Karai ma tu a'e i luga. Na ia toso a'e foi i luga ma Elisapeta. Na iloilo solo e mata o le fafine le potu, a e lē mo ni aitu le taimi nei. Na vaaia e Karai le malamalama i le ma'ini o lona muāulu. Na ia faamaulu lana mata tioata.

"Atonu sa nanā iinei e lo'u tamā le mea na saili e tagata na fasiotia o ia."

Na savali atu Karai aga'i i le mea na faatali ai Koualasaki i tafatafa o le maa foliga-kone. "O lou tamā sa i ai lona naunauta'iga faapitoa i le omofalosi o le malumalu."

Na mulimuli atu Elisapeta ma lona faanunumi. "E faapefēa ona e iloa lena mea?"

Na faamatala 'oto'oto e Karai a'afiaga o le uila faaleitiō ma sii a'e i luga le masini Gama-Sikauti. "O le ta'iala o lou tamā na faasino ma oo mai iinei, ma ia te a'u la ia, o le malosi o le faitauga a le masini mai lenei nofoaga, e iloa ai e umi se taimi o latalata o ia i le maa."

Na tau pula itiiti Elisapeta i le faalogo atu i puapuagā sa oo i ai lona tamā. Ui i lea, na ia tālo atu ia Koualasaki. "E i ai le mōlī uila mo faalavelave o loo palaka i le puipui i le itu lena."

Na lue mai lona ulu ma alu avane.

Sa faalatalata atu Elisapeta i le maa. "E foliga malō mai, a o totonu o loo avanoa. Ua na o se maa tanoa feliua'i e vane mai maamora." Na ia tusi atu i le pūsa i le pito i luga.

Sa malamalama Karai. Mata sa faigofie lava i lona tamā ona faapa'ū ifo i ai se mea i totonu. Na tuu mai e Koualasaki le mōlī uila, ona ia faalagolago atu lea i luga o le maa, ma faasaga atu le susulu i le ogatotonu o le maa. E sa'o e gaogao. I le pito i lalo, na suluia ai 'apa'apa o le pailate sa lagolagoina le maa. Na ia feliuliua'i solo le sulu ma iloa atu ai se mea o loo taatia i le tasi itu. E foliga mai pei o se maa ua polesi, o lona lapo'a pei o se fatu meleni suamalie.

"E lē mafai ona iloa atu poo le ā," na ia memumemu mai ai ma tu i luga. "E tatau ona si'i 'ese le maa."

"E mamafa," o laa Elisapeta lea. "E to'a ono tamaloloa na latou si'i ese mai le pusa. A e i ai le kolopā i mea faigaluega o loo i tua. Ou te iloa e mafai ona tatou si'ia. A e tatau ona matuā fai ma le faaeteete."

"Lea la'u alu e aumai," na fai ane ai Koualasaki. A o laa ese o ia, a e tatagi loa le telefoni o i luga o le laulau a Elisapeta. Na ia savali atu i ai ma siaki le tagata o loo valaau mai. "O le sikulakī." Na ia siaki lana uati, ona tepa atu lea ia Karai. "Ua leva ona te'a le taimi e tapuni ai. Atonu o loo latou siaki mai pe fia le umi ou te galue ai i lalo iinei."

"Fai i ai pe toe tasi le itulā."

Na luelue lona ulu ma tago atu e tali le telefoni. Na ta'u atu i ai o ia mo le faamaoniga, ona faalogologo lea pe se ā. Na pupula faalautele ona mata. "Ua lelei, ou te malamalama. O le a matou o atu nei lava."

Na tuu i lalo le telefoni ma liliu atu ia Karai. "Ua logo mai e se tasi le taufaamata'u o se pomu. I inei i le fale mataaga. Ua faa-taape ma tu'ua e tagata uma le fale.

Sa nofo filemu pea Karai. Na ia iloa o se taufaamata'u faapenei, a e maise i le taimi lenei, e lē o se mea na pau ua fetau i lona tula'i mai. Na ia faitauina foi lea lava lagona i mata o le fafine. "E i ai se tasi na ia iloa," na ia fai atu ai faagesegese. "O le mae'a ai o le fanafanaga i le Molo i le asō, e leai se isi na te faate'a'ese se taufaamata'u o se pomu. O se faanoi sili ona talafeagai lea, a o fai se saililiga mae'ae'a o le fale."

Na ia liliu ane e toe su'esu'e ma le toto'a le omofalosi. Ua ututi le taimi o totoe mo mea mananaia.

Sa pei e malamalama foi Koualasaki i lea tulaga. Na ia foi mai tua o le potu teu oloa. "Na ou lagona mai," na fai atu ai o ia. E lē o se kolopā na sau ma ia, a o se samala lapo'ā na ia amo mai i ona tau'au. "O ese."

"Leai!" Na lapata'i atu ai Elisapeta.

Peita'i e lē talia e Koualasaki se Leai. Na vave ona ia lalata atu i lana laa e tasi, sii a'e le samala i luga o lona ulu, ma sasau ifo i lalo.

Na 'e'ē Elisapeta i lona mata'u i le meatotino ua faiatua selau tausaga le matua.

E le'i lavea tonu le ma'a o anamua, peita'i na pa'ū ifo le samala i 'apa'apa o le pailate sa fai ma lagolago i le omofalosi. Na gaui ma salalau solo fasi laau. Na toe sii a'e i luga e Koualasaki le samala ma toe taia isi 'apa'apa i le itu lava e tasi.

(fa'aauau Sulu Samoa Mati 2022)

NA O AFIOGA E TULEI MAI FOFOGA O LE ALII

O FETŪ LAGOLAGO

“¹⁰Faauta, a oo oulua i totonu o le aai, tou te fetaia’i ma le tagata o ave le vai o mea,” Lk 22.

Pe a fai laugā togi o ata tifaga e ta’ua o le Oscar, e fautuaina ma faatutū mai suafa o fetū pupula – i latou e autū i ai ata tifaga eseese, faapea isi tulaga tofi e pulea le poloketi. Peita’i, e lē mafai ona manuia ma manumalo le vaega autū, e aunoa ma le lagolago ma fesoasoani malosi a isi tagata, e ui ina e lē iloa, e lē ta’ua o latou suafa. E ala ona susulu malosi fetū autū, ma pupula malosi mōlī tetele, ona o le lelei o le lagolagosua, ma le maopoopo o le fesoasoani atu, a fetū laiti, o fetu lagolago.

O loo molimau le Tusi Paia e faapea foi le Atua ona i ai le toatele o ana fetū lagolago; o tagata e fiafia e galulue mai tua atu o le ata. O i latou ia e fai o latou tiute, faatino o latou tofi ma fai le auaunaga masani ua valaaufina ai i o latou aiga, i ofisa, i le Ekalesia ma le Malo; e galulue filemū, sāō ma lē magagana, e galulue fiafia ma tautua faatuatua ma le faamaoni. E ati a’e aiga ma faatagata le lalolagi, e fausia ma faaleleia pulega faale malo, e faateleina atina’e ma tamaoaiga pisinisi, e tutupu ma ola Ekalesia – faafetai i le sao tāua o i latou e faatinoa mea laiti ma le faatauvaa, o mea e iloa ai le eseesege tele.

E toatele tagata faapenei i tala o le faaolataga, e pei o tagata o loo ta’ua e Luka – *le tagata o ave le vai omea*. E leai sona igoa, e lē iloa pe matua pe se talavou, o se tane foi pe se fafine (auā o le galuega lea e fai e fafine); a o ia lea na mulimuli i ai Peteru ma Ioane, a o ia ta’ita’i i latou i le fale. E faapea foi i *le matai o le aiga* na latou tau atu i ai, na fesili i ai le au sooo ma na faasino ane le afeafe tele aupitoaluga. O nei tagata sa fai o la’ua sao, a o sauni atu le Alii i la latou talisuaga mulimuli, a o lumana’i ai lona faasatauroina, ma e tele ina sopoloa i le vaai a tagata – a e lē lilo i le Atua! O le ā lava lau feau o loo fai, o le ā le itiiti ma faatauvaa, ia e taofi mau ma manatua le folafolaga lenei i lou loto, “¹⁰Auā e lē amiolētonu le Atua, na te lē faagalagaloina la outou galuega ma le alofa ua outou fa’ali mai ai i Lona suafa, auā na outou auauna i le au paia, i le o loo outou auauna i ai.” Epe.6. O le mea lea, ia faamalosi ma loto tele, ia onosai ma faamaoni, ia galue fiafia ma auauna ma le faatuatua. Ua fetalai mai Iesu, “¹²Faauta foi, ou te vave alu atu; ua ia te au foi le taui ou te taui taitasi atu ia tusa ma lana amio.”

O LE FEAU NA ‘AUMAI OE E FAI

“³⁸O Iesu o le Nasareta..o Ia sa femaliua’i ma agalelei...” Galu.10.

O lou tāua i fofoaga o le Atua na faatumauina i le satauro. Fai mai le Tusi Paia, “³²O Ia lava sa na lē faasaoina Lona lava Alo, a ua tuuina mai o Ia ona o i tatou uma lava, e lē foai fua mai ea e Ia ia te i tatou mea uma lava faatasi ma Ia i se ā?” Roma 8. Maitau mai upu o loo faamamafa, **mea uma lava**. E tutusa i tatou uma ia Keriso.

Peitai a oo mai loa i a tatou feau ma galuega ua valaaufina i ai i tatou, ona iloa lea, o lo tatou tāua e faavasegaina e le lavelave ma le ogaoga o le faafitauli tatou te fofōina. O le mafuaaga lena e taugatā ai le foma’i e faia ta’otoga o le fatu, nai lo le faatau oloa i le fale’āiga.

O Iesu sa avea ma foma’i o faafitauli. E toatele i latou na gālala i le fia ‘a’ai faaleagaga; sa la fetalai atu, “³⁵O a’u nei le areto o le ola.” Ioa.6. Na latou mama’i, “ona Ia femaliua’i lea ma agalelei ma faamalolo atu i e na faatoilaloina uma lava e le tiapolo”. Na Ia iloa tino o mea sa ia te Ia, na mana’omia e isi tagata, ma sa la faasafua atu i ai mo i latou. O le ā se mea o ia te oe e ofoina atu? O le ā se mea e te taumafai e fai, pe afai e te silafia e te mafaia, ma e lē mafai ona faalētonu? E te le’i sau faafuase’i i le lalolagi, e i ai le feau ma le faamoemoe o le Atua na auina mai ai oe ma a’u. Fai mai le Atua ia Ieremia, “⁵Na a’u iloa oe a o le’i faia oe e a’u i le manava; na a’u faapaiaina oe a o le’i fanau mai oe, na a’u tofia oe e fai ma perofeta i nuu.” Iere.1.

Soo se mea e faia e le Atua, na te fai ina ia tali ai se mana’oga ma fofō ai se faafitauli. O lea la, o le ā se mea ua valaaufina ai oe, ma faa-aaupuegaina ai oe, ma faamanuiaina ai oe e fai? O iina e te maua i ai le tulaga aupito maualuga o lou fiafia ma olioli! Ina ua e iloa ma faataunu le feau na auina mai ai tatou e fai. Mafaufau i lou sao tāua i nisi tagata o se tofiga mai le Atua. Na fai fale’ie Paulo ina ia lagolagoina ma fesoasoani ai i lana galuega tāla’i. E faapena foi ona lagolago a tatou feau ma galuega i le misiona a le Tala Lelei. Pe o tatou o ni tagata tāla’i ma folafola o galulue tumau, pe o ni tagata tāla’i faa-vaitaimi, ia ‘aua ne’i o tatou tuua lenei lalolagi, a e tatou te le’i maumautaia ma faataunu, le feau na valaaufina ai tatou e le Atua e fai.

IA TA'ULELEIA IESU I LAU FEAU

“¹³O outou, o le masima o le lalolagi outou; ... ¹⁴O outou, o le malamalama o le lalolagi outou. ...” Mataio 5.

O silafia e tagata o loo outou nutimea faatasi, o oe o se so'o moni o Keriso? Pe se ā so latou manatu i lou vā feagai ma i latou o i luga atu, o ta'ita'i ma faauluuluga o lau galuega? O latou iloa e te fa'aaloalo ma usita'i i ou ta'ita'i, pe e te tete'e i a latou faatonuga ma fōua la latou pule? A e faapefea tagata o loo e pulea ma vaaia? O latou iloa oe se pule sauā ma le 'ote, pe o oe se ta'ita'i lagolago ma fesoasoani ia lelei atili la latou pito laau? Afai e te galue i se ofisa e i ai taimi amata ma taimi mānava, e te tausi ma faamaoni i ia taimi? O fa'aalu le 100% o ou itula i tiute fitoi tonu ma le galuega, pe o le 75% e alu i mataupu tau oe lava ia ma le manuia o lou aiga? O e faatinoina ou tiute ma le atoatoa o lou loto e naunau ia na o mea silisili e te faia? I se isi faaupuga, o ta'uleleia Iesu ma vivii tagata i le Atua i le faataunuina o lou valaauna, i le galuega o e auauna ma tautua ai?

Pe afai e amata ona e matuā mafaufau loloto i ai, o le taunuuga faavavau o nisi tagata o tou galulue faatasi mata o loo faalagolago i lau amio, lau galue ma lou faatuatua. Atonu o le taimi nei e lē o matuā naunau tele i latou e faalogo ia te oe pe a talanoa i mataupu tau le Atua. Peita'i e mafai ona suia atoatoa i sina taimi puupuu. Pe a fetaia'i tagata ma puapuagā o le olaga e pei o le oti, o ulugalii tete'a, o ma'i ogaoga, faamalolo mai galuega ma isi faafitauli, latou te manaomia se tagata e maua ai tali e sa'o, e moni ma e tonu. O taimi ia latou te sailia ai tama talavou na lafo i le ogaumu 'a'asa ma le lua o liona, ona ua leai ma nisi i o latou autafa e i ai ni tali e faatuatuaaina. Ua a'oa'o mai Iesu, “¹³O outou, o le masima o le lalolagi outou; a e afai e magalo le masima, pe se a se mea e faamāi a'i? E leai se mea e toe aogā ai, na ona lafoa'iina i fafo, ma solia e tagata. ¹⁴O outou, o le malamalama o le lalolagi outou. E lē mafai ona lilo le aai ua tu i luga o le mauga.” ¹⁵Latou te lē tutuina foi le molī i le tuu ai i lalo o le mea e fua a'i saito, a e tuu i luga lava o le tuugāmolī ia pupula atu ai i e o i le fale uma. ¹⁶Ia faapea ona pupula atu lo outou malamalama i luma o tagata, ina ia latou iloa la outou amio lelei, latou te vivii atu ai i lo outou Tamā o i le Lagi.”

ILE MEA O I AI LE MATAU'A,

ŪLŪ I AI FATU O LE FILEMU

“¹⁶Auā o le mea e i ai le matau'a ma le misa, o i ai le fe'avaua'i ma mea leaga uma.” Iakopo 3.

Ina ua fesiligia se tasi faifeau e se alii e faigatā ona faa-talitonuina, “E te talitonu e i ai se mea e ta'u o se temoni māo'i?” Sa ataata le faifeau ma tali atu, “Ua e alu i se fonotaga faale-tausaga a se Ekalesia?” O le upu moni, afai ua avea oe ma se sui o le Ekalesia mo se taimi umi, ua tatau foi ona e silafia, o taua'igā misa ma maseiga e fiafia tele e tuu lona ulu matagā i totonu o le aiga o le Atua, e pei ona ia faia i soo se nofoaga.

O Paulo ma Panapa o se 'au misionare e sili ona atamamai, a e o lo la'ua fe'ese'esea'i i le mataupu faasino ia Ioane Mareko, na i'u lava ina lē mafai ai ona la'ua toe galulue faatasi. Mulimuli ane ona toe sui lea o le mafaufau o Paulo, peita'i sa le'i mafai lava ona toe liliu i tua le taimi ina ia toe faasa'o ma toe faalelei. Na ia aioi atu “²ia Evotia ma Sunetui, ia tasi lo la manatu i le Alii. ³Ou te faatoga atu foi ia te oe, lo'u fesoasoani faamaoni, ia e fesoasoani ia te i la'ua; o e na finau faatasi ma a'u i le Tala Lelei.” Filipi 4.

O le matau'a e punitia ai a tatou tatalo, na te ave'ese la tatou faamamafa i agaga ne'i leiloloa, ma faavaivaia i tatou i la tatou galuega tala'i. E tatau ona tatou a'oa'o e amanaia taleni a isi tagata, o a latou fuafuaga ma o latou tofi ma tulaga, nai lo le ita fua pe inoino i ai. I se isi faaupuga, ia taumafai e 'ese sou manatu, aunoa ma le fe'ese'esea'i. O la le Tusi Paia: “¹⁶Auā o le mea e i ai le matau'a ma le misa, o i ai le fe'avaua'i ma mea leaga uma. ¹⁷A o le poto mai lugā e muamua ona mamā, i le ua filemu, e agamalū, e ganagofie, e tumu i le alofa ma fua lelei, e lē alofa faapito, e lē faatagāfai. ¹⁸Ua lūlūina foi le fua o le amiontonu ma le filemu e i latou o e faatupuina le filemu.” Iakopo 3.

E faamanuia le Atua i ē faatupuina le filemu (Mataio 5:9). O le mea lea pe afai e tula'i mai le matau'a i totonu o la outou Aulotu ma le Ekalesia, o totonu o le nuu ma totonu o lou 'aiga, i lau galuega po o lau a'oga ma soo se faapotopotoga Kerisiano e te auai, ia fai ma au misiona le lūlū atu i ai o fatu ina ia ola ma tupu tele le filemu.

A'OA'O LE UPU A LE ATUA, E FAAEAINA AI OE

“¹⁸Ia e faapupula mai o'u mata, ia ou vaai lava i mea e ofo ai i lau tulafono.” Sala.119

O le faasinoala mo le manuia o su'esu'ega i le Tusi Paia, o le tausisi lea ina ia faia i aso uma, faavasega lelei, ma ia o faatasi ma le tatalo. Fai mai le tatalo a le Fai Salamo, “¹⁸Ia e faapupula mai o'u mata, ia ou vaai lava i mea e ofo ai i lau tulafono.” Sala.119. E 3 ni mea tāua o loo aofia ai iinei:

(1). *O le a faasino atu e le Atua le mea moni e uiga ia te Ia.* O le a e iloa lelei Lona natura, o Lona finagalo, ma mea na te faatāua. Ma afai sa e tupu ma soifua a'e i totonu o se aiga ma ni mātua sauā ma tia'i soo oe, o le a e silafia e lē faapena lou Tamā i le Lagi; e matuā ese lava ia – e tulaga ese ma silisili ese Lona alofa.

(2) *O le a faasino atu e le Atua le mea moni e uiga i isi tagata.* O le a amata ona e malamalamā i lo latou sao, ma amata ona e taliaina lo latou tulaga i lou soifua. O le a amata foi ona e amana'ia ma faatāuaina o latou mana'oga, ma lau saofaga e finagalo le Atua e fai ina ia fesoasoani ai ia te i latou. Mo lou silafia, pe afai e faamanuia atu le Atua ia te oe, o lona uiga masani, ia avea oe ma faamanuiaga mo nisi tagata.

(3) *O le a faasino atu e le Atua le mea moni e uiga ia te oe.* O le a amata ona e maumautaia ma le fiafia lou tāua ia te Ia. O le a Ia faasino atu ia te oe ou vaivaiga ma faafitauli. Peitai na te faia foi mea e sili atu nai lo lena. O le a Ia faasino atu ia te oe le tele o gafataulima na te silafia o loo ia te oe, ma ana fuafuaga faataatitia mo oe.

O le mea lea, ia faa-avanoa se taimi o aso taitasi e te su'esu'e ai i lau Tusi Paia. O se vaega o lea taimi tau lava ina faitau, e aunoa ma le tau saili pe su'esu'e i le lavelave ma le loloto o ona uiga faaleagaga. Faitau ma miti'ia pe se ā o loo finagalo ai o Ia, ma tuu i Lona Agaga e fetalai atu i lou loto. Ma se isi mafaufauga faaopoopo: talu ai ona o le Tusi Paia na o le pau lava lea o le Tusi na tusia e le Atua, ma e i ai le aso tatou te tutū ai i luma o Lē na tusia le Tusi, e te lē lagona le fiafia o le a e tula'i atu ma molimau atu, sa e faitau i Lana Tusi?

E TOE AVATU E LE ATUA LOU AVANOA FAALUA

“¹²Ona outou valaau ai lea ia te a'u, e ū foi outou ma tatalo ia te a'u, ou te faalogo foi ia te outou.” Iere.29.

E fitu sefulu tausaga o nofo pologa Isaraelu i totonu o Papelonia, talu lo latou lē usitai i le Atua. Na latou ola ai i se soifuaga faanoanoa ua aunoa se fiafia, ua leai se saolotoga, ua lē iloa foi lo latou faasinomaga; ua latou talitonu o lo latou malaia lea, ma le i'uga o lo latou avea ma nu'u māvae, o le nuu o le Atua. Peitai e le'i uma fuafuaga a le Atua mo i latou. Na Ia fetalai ma ta'u atu ia te i latou, “¹⁰Afa'aatoatoaina tausaga e fitugafulu i Papelonia, ona ou asiasi ai lea ia te outou, ma ou faataunuina la'u upu lelei ia te outou, i le faafoisia mai outou i lenei mea. ¹¹Auā o a'u nei, ua ou iloa manatu ua ou manatu ai ia te outou, o manatu i le manuia, a e lē o le malaia...e foa'iina atu ia te outou le iuga e i ai le faamoemoe. ¹²Ona outou valaau ai lea ia te a'u, e ū foi outou ma tatalo ia te au, ou te faalogo foi ia te outou. ¹³E saili mai outou ia te au, tou te maua foi, pe a outou saili mai ia te au ma outou loto atoa. ¹⁴E maua lava a'u e outou..; ou te faafoisia la outou tafeaga, ma outou faapotopotoina outou ai nuu uma, ma mea uma na ou tulia ai outou..; ou te faafoisia foi outou i le mea ua ou faatāfea ai outou,” Iere.29.

Atonu o lena ua fai sina sapa ese o lou sā mai le moa o le ala. O i tatou uma lava o tagata e vaivai, ma e faapena foi ona sala ese o tatou ala mai lea taimi ma lea aso. A e afai e te masani ona faitau le Tusi Paia i tala o tagata sa valaauiina ma filifilia e le Atua ma Ia faamanuia i ai, e te iloa ai o se mea masani lava le toilalo, e lē tulaga ese le sesē ma le faasaga ‘ese mai le ala e tatau ona ui ai. E masani ona avea le sesē po o le pi'o, o se vaega o le taamilosaga o le a'oa'oina o i tatou. O le upu moni, e leai se laasaga o lou tuana'i po o le taimi nei, e lē mafai ona fa'aaogā e le Atua. Ina ua tatou o mai i lenei lalolagi, e leai ma se tasi o i tatou na ia silafia lelei ma le mautinoa pe se ā e fa'aaogā i ai lo tatou olaga. A e leai se afaina o lena mea. Tau ina amata tonu i le mea o loo e i ai i le taimi nei. Pe afai e toe faasa'o ma toe tuu oe e le Atua i le ala tonu e tatau ai, na te amata i le tuuina atu ia te oe o le agaga o le faamoemoe, auā na o le faamoemoe lava mai le Atua, na te lagolagoina oe i taimi o faigatā.

O I LATOU UA FAI I LAGI FOLAUGA

TO'AONO FAATONU VAIFALE

24/9/1950 - 25/1/2022 (71+4+2)

Na soifua mai i lona aiga i Leauvaa i le Aso Sa 24 Setema 1950. Ae na faamānavaina ana galuega i le lalolagi nei, i le Aso Lua 25 Ianuari, 2022. O ona matua o Vaifale Suliasi Vaifale Vui Faatonu o Leauvaa, ma si ona Tina o Filomena Salā Tauti'aga o Leauvaa ma Samalaeulu Savaii. Na faaipoipo atu i lana manamea o Faifua Katarina Pili o Nofoalii, ia Tesema 24, 1977 i le EFKS Honolulu Hawaii, e le susuga ia Iosia Evile FT, a o le'i avea ma Toeaina. E toatolu ona alo, toalua teine, ma le tama e toatasī. E toafā fanau a lana fanau. Sa tautua i le militeri a Amerika i tausaga 1972-1975. Ua leva ona galulue i se tasi o Ekalesia tutoatasī i Amerika nei, a o le tausaga 1992, na faauuina ai lo la tofi tiakono i le EFKS AGAPE, Garden Grove, USA.

O se Tamā faamoemoeina, ma faamaoni i le tauaveina o ona tofiga i le aulotu ma le Ekalesia. Na avea ma Ta'ita'ifono a lenei aulotu i tausaga e tele. Na avea ma Ta'ita'i pese, na fai o ia ma ta'ita'i tiakono a le aulotu ma le Pulega. Sa fai foi ma teutupe a tiakono o le Matagaluega. Na avea foi o se sui usufono a le Matagaluega a Amerika i le Komiti o Aoga a le Ekalesia Aoao. Usufono a le Matagaluega i le Fono Tele i tausaga e tele. A'o se fiafiaga i le Tamā, ina ua mafai ona tautua i le Laoa'i o le Talisuga a le Alii i le Iupeli. O se tofiga e maua gatā. Sa faamatua i le galuega i totonu o le aulotu. O se Tamā e naunau ina ia lelei le gasologa o feau faaleaulotu. A momoli sona finagalo, e lē 'alo sana saunoaga. Na i ai le taimi na tau faalētonu ai le galuega, a o ia ma nisi o Tamā ma Tinā, na tutū malosi ina ia faasaoina ma laveaiiina meatotino a le aulotu. Sa fa'aaogā tatau foi lana taleni o le kamuta, e

faaleleia ai le maota tapua'i ma le teuteuina o lo matou fanua. O Vaifale o se auauna aogā.

O le tausaga e 2020, na maua mai ai le faaaliga mai foma'i, ua aafia i le gasegase o le leukemia, poo le kanesa o le toto. E lē o se gasegase faigofie, ae na tauivi mai lava le Tamā, ma tiga o le ma'i. Na faata'otolia i le maota gasegase, ma faailoa mai e foma'i, e lē o toe umi se taimi, ona ua malosi lava le kanesa. Sa matou mafuta lava ma le Tinā ma le fanau i tafatafa o lona moega, a'o faasolosolo malie atu lana mānava, se'ia oo ina faatofa mai. Ao le matagofie o le Atua, na vaaia i lea afiafi, ona o le to'amalie o le Tinā ma le fanau. O failogi, ua latou talia ma le loto malie, le finagalo o le Atua.

O ona sauniga faale-aiga, na faia lea i le aso 17 o Fepuari 2022, i le fale maliu o le Forest Lawn. Sa ta'ita'ia lava e le lupe faalele a lona aiga, le susuga i le Toeaina o Selulo Lagoo FT, ma molimau ai le fanau, ma le toatele o aiga, i le soifua 'anoa o le Tamā. O ona toe sauniga, na faia lea i le aso 18 o Fepuari 2022, i le Patriot Chapel. Na ou ta'ita'ia le sauniga ma faia lona molimau faaleagaga. Sa molimau le faletua o Faifua, e tusa o le mafutaga ma le Tamā. O le susuga i le faifeau o Time Laufili FS na saunia talosaga. A o le susuga i le faifeau o Apela Ahim FS, na saunia le upu faamafanafana. Na faamamafa e le faifeau le Salamo 23, O le tagata malaga, e malaga ma le mautinoa, e taunu i aao o le Atua. E i ai lape o auauanaga, e lē 'asa foi se faiva ma se maumau, ae ua na o le Atua lava, na te faamasino le tagata. A e a'oa'o mai pea ni lelei, ma ni aogā o lana auauna, mo i tatou o loo galulue pea.

Na ou faai'uina ona toe sauniga i le tuugamau. Ma matou faatofa atu ai i le Tamā, i le pese faatofa a le Ekalesia, *Talofa uso e, Tofaina oe*. Mapu atu ia oe Tamā i aao o le Faavavau. O loo faatalitali mai, se'i avatu se taui o lou tautigā.
Manuia le malaga.

*Saunia: Susuga Filo Taua 'ivale FS,
EFKS AGAPE, Garden Grove,
Matagaluega AMERIKA.*

SOONALOTE LEATI TAUAALETOA

10/3/1936 - 10/1/2022 (85+10+1)

Na soifua mai lenei tina i le Aso Lua, 10 Mati 1936, ae na valaaau mai i ai le Atua i le Aso Gafua, 10 Ianuari 2022 ina ua atoa le 85 tausaga, 10 masina ma le aso e tasi o lona soifua. O ona toe sauniga sa faia lava i lana ekalesia sa tautua ai i tausaga e tele o le soifua, le Ekalesia Faapotopotoga Kerisiano Samoa i Laulii. O a'u sa faaulufaleina mai le sā o le tinā ma ta'ita'i i ona toe sauniga, a e o le Faifeau Aso Fitu Tutoatasi ia Faatafa sa faia le tatalo, o a'u foi sa faia le molimau faaleagaga ma faia se upu faamafanafana mo le aiga, ma le ekalesia ua tuua ona o le valaaau a le Atua.

Sa fa'aaogā foi nisi o fesootaiga faaneionapō ma faia mai ai molimau a nisi o le fanau o i atunuū e mamao ua lē pa'au mai ona o faigata o femalagaiga i nei ona po. Sa molimau foi nisi o fanau ma ona aiga i Samoa nei, ma e auga uma molimau o se tina e loto maulalo ma alofa i lona aiga, ona uso ma ona tuagane. Sa fa'aautū lava le molimau faaleagaga i le upu foi na molimau i ai i le valaaau a le Atua i lona alii ia Valaaau Leati i le 2012, le upu a Tavita ia Saulo ina ua taumafai Saulo e faa'ofu Tavita i ona ofu tau, ae fai mai Tavita, "ou te lē mafai ona alu ma nā mea auā ou te lē masani ai." Auā foi e lē se tagata e malosi, pe tulaga ese foi sona tamaoaiga, e lē se tagata foi e maualuga sona tulaga ma taualoa, ae sa faia lava le tautua i le mea e gata ai.

Sa maliu le tamā o le aiga ona alu lea o le matāfale i le fanau, ae na toe sau lava ma tatalo mai e tuu pea lona suafa i lana matāfale ma faia ai lava le tautua seja oo ina valaaau mai le Atua. O le feau o lea aso o le upu a Paulo i le ekalesia i Roma, "e lē mafaiā e le otī po o se isi mea ona vavae'eseina i tatou mai le alofa o le Atua e ala ia Iesu," e manumalo pea lava le alofa o le Atua. Le alofa lea e saili mai, e faaola mai, e tumau foi ma faamautūina ai lo tatou avanoa i le ola e faavavau. O a'u foi na ta'ita'i i ona toe sauniga i lona oliolisaga tumau, ma matou faatofa atu ai i le pese faatofa a le au Kerisiano, *Talofa uso e, tofaina oe.*

Tofa Tina, manuia lau malaga.

*Saunia: Susuga Pita Toleafoa FS,
EFKS Laulii,
Matagaluega VAIMAUGA.*

TO'AILOA LEITUFIA LOLI TUĀUTULIVA PELETI TO'AILOA

29/5/1949 - 19/11/2021 (72+5+22)

Na soifua mai le tamā i le Aso Sa 29 Me 1949, ae na valaaau le Atua ma faamanava feau i le Aso Faraile 19 Novema 2021, ma ua 72 tausaga, 5 masina ma le 22 aso o le soifua. O le tele o le soifua o le tamā o Amerika, ae na toe taliu mai i Samoa ina ua filifilia e lona aiga i le suafa Toailoa ma faia ai lana Saofai ia Me 2019. O le vaitau lava lea na amata ai ona matou galulue ma faia ai le tautua i le Atua e ala i le ekalesia o se matafale fesoasoani, seja oo ina faamautū i le masina o Ianuari 2021 lo la matafale, ina ua aga'i mai o le a nonofo mau i Samoa.

O ona toe sauniga sa faia lava i le malumalu o le Ekalesia Faapotopotoga Kerisiano Samoa i Laulii, i le Aso Faraile 3 Tesema 2021. O le Faifeau Samoa ia Mose Galuvao FS na faaulufaleina mai le sā o le tamā. O le Toeaina o le Faapotopotoga a le Atua (AOG) ia Patolo Matalasi na tatalo ae o a'u na faia le molimau faaleagaga ma faia le Lauga. Sa molimau ona uso ma fanau mai atunuū e mamao, o lona uso le Toeaina Malolo ia Toese Peleti Toailoa FT, o le Faifeau ia Esera Esera FS, o le Aoao Fesoasoani ia Tuautu Kalepo AF aemaise le tausi ia Perū. E auga uma lava nei molimau o se tagata lava e alofa i lona aiga, sa pele ia te ia ona aiga, o lona nuu ma lana tautua i le ekalesia.


Sa fa'aautū foi le lauga ma le molimau i le autū o mafaufauga faa-le-agaga e tusa ma le Tusi Faitau Aso "Ua leai se mea o totoe, vaganā faavae", auā o lea ua fulitua mai le tamā, sei vagana ana a'o'oga ma faata'ita'iga, e fai ma faavae o le soifua tautua ma le soifua auauna o le fanau ma le aiga. Auā o la'u foi lea molimau i le tautua a lenei tamā e ui lava ina puupuu le taimi na o matou mafuta ai, a e o le tautua a se tagata e pei e lē toe i ai se isi aso a taeao, auā e faia lava le auauanga i le mea e gata mai ai, o le mea sili lea mo ia. Sa maua lava taimi e mafuta atu ai a o gasegase, o nai taimi mulimuli e ui ua lē lagona lona siufofoga, ae sa loto tele lava i le Alii, ma sa ia matuā sauni i soo se taimi e finagalo ai le Alii. O a'u foi na ou ta'ita'i i sauniga i le tuugamau, ma matou faatofa atu ai i le pese faatofa a le au Kerisiano. Manuia lau malaga Tamā.

*Saunia: Susuga Pita Toleafoa FS, EFKS Laulii,
Matagaluega VAIMAUGA.*

AVELE TOTOLUA UTUMAPU FS



TOAONO FAATONU VAIFALE TK



Tala'aga Soifua Avele Totolua Utumapu FS

Aso Soifua: Aso Toonai, 6 Iulai 1957 (64yr+5mth)

Aso Maliu: Aso Lua, 21 Tesema 2021 (16 days)

*Tamā: Poneuila Utumapu (maliu) Saipipi & Vaie'e
Tinā: To'aivalesao faigaolefaletuia 'ana Perelini
(Fasitoo-tai, Fagaloa, Apai, Matatufu, Matautu
Lefaga). Uso: Feata Tusivili Perelini FS.*

Faaipoipo 1: 1984 ia Litia Feata Tagaloa (maliu)

Faaipoipo 2: 2012 ia Fatipule Gagaeolo Tafā

A'oga: Tulaga Lua Vaitoomuli & Gataivai,
Leifiifi Inter. Sch, Kolisi Samoa, Kolisi Pesega.

Valaauiina: 1981-1984: Kolisi Faafaifeau Malua

1985-1991: Faifeau EFKS Suga, Vailele

23 Me 1987: Faauu Tofi Faifeau Samoa (FS)

1991-2003: Faifeau EFKS Letogo

2003-2021: Faifeau EFKS Apolima-uta.

Tofiga sa galue ai:

Sui Apia Sasa 'e Komiti Atina 'e.

Failautusi Pulega Vaimauga Sasa 'e.

Failautusi Matagaluega Apia Sasa 'e (2003).

Sui Matagaluega Aana Komiti Au Leoleo.

*Saunia Tusi Au Leoleo, Ianuari-Juni 2017,
Oketopa 2019. Filifilia avea ma Sui Peresetene
Komiti Au Leoleo 2019-2021. Sui o le Komiti Au
Leoleo i le Komiti Feau Eseese - 2021.*

O ona Toe Sauniga: Ta'ita'i - Taise Ioapo FT,
Faaulufale-Amosa Silipa FS; Tusi Paia - Ieremia
Saufoi FS; Tatalo - Lima Maluelue FS, Lauga -
Napoleone Vaiaso FS. O lona oliolisaga tumau
o i lona fanua i Siusega, Faleata.



SOONALOTE L. TAUAALETOA